



## Coimisiún na Scrúduithe Stáit

### Scrúduithe na hArdteistiméireachta sa Cheol, 2016

#### D'Údaráis na Scoileanna

**Féachtar chuige, le bhur dtoil, go dtugtar na Nótaí Eolais agus an póstaer atá ag gabháil leis seo d'aire na múinteoirí Ceoil agus na n-iarrthóirí. Tugtar na nótaí seo a leanas do bhur n-aire freisin:**

1. Reáchtálfar na scrúduithe go léir (an Teicneolaíocht san áireamh) de réir riachtanais an tsiollabais, mar a shoiléirítear sna Nótaí Eolais atá ag gabháil leis seo. I gcás na scrúduithe Teicneolaíochta, ní mór d'údaráis na scoile deimhin a dhéanamh den ábhar go léir a ionchuirtear agus a chuirtear in eagar le linn na scrúduithe a ghlanadh den ríomhaire (glúine)/ghléas stórála seachtrach a úsáidtear nuair a bheith na scrúduithe críochnaithe sa scoil.
2. Beidh na trialacha sa cheolchasadh ar siúl sa tréimhse ó 11 Aibreán go dtí 22 Aibreán 2016, an dá dháta sin san áireamh. Ní mór do na hiarrthóirí a bheith i láthair don seisiún scrúduithe a shocraíonn an scrúdaitheoir dóibh.
3. Más mian le hiarrthóir scoile a bheith i láthair don scrúdú in ionad eile seachas a scoil féin, ní mór dó/di cead a fháil ón ionad sin ar dtús. Ní mór do Phríomhoide a scoile féin 'Foirm PROS' a chomhlánú ansin agus í a chur ar ais chuig Coimisiún na Scrúduithe Stáit roimh 22 Eanáir 2016. Ní cheadófar athrú ionaid d'iarrthóirí a iarrann athrú tar éis an dáta sin.
4. Is gnách go mbíonn na trialacha praiticiúla ar siúl le linn na ngnáthuaireanta scoile. Ní bhíonn trialacha ar siúl le linn am lóin. Is gá na scrúduithe go léir a thosú ag an am a aontaítear leis an scrúdaitheoir. I gcás scoileanna a mbíonn leathlá sa tráthchlár acu, d'fhéadfadh sé gur gá trialacha a reáchtáil ag an am sin. **Ní mór** duine fásta a bheith i láthair i rith an ama le maoirseacht a dhéanamh ar son údaráis na scoile.
5. Tharlódh i gcásanna eisceachtúla go gcuirfeadh moill i scoil isteach go mór ar sceideal scrúdaitheora, agus tharlódh gur gá cuid de na hiarrthóirí a athsceidealú tráth éigin eile le linn thréimhse na scrúduithe.
6. Moltar d'Údaráis na Scoileanna **gan** tráthchlár a thabhairt d'iarrthóirí toisc nach féidir a mheas go beacht cén t-am a bheidh triail phraiticiúil áirithe ar bith ar siúl. Tugtar do bhur n-aire freisin go gcuirfidh cuairt mhonatóireachta ó Scrúdaitheoir Comhairleach moill ar na trialacha. Níl neart air seo agus tá sé riachtanach chun slánchúis na scrúduithe a chinntiú.
7. Tugtar d'aire na scoileanna gur treoraíodh do na scrúdaitheoirí gan ach líon áirithe iarrthóirí a chur faoi scrúdú gach lá, agus is féidir go mbeidh líon éagsúil i gceist gach lá. **Is cóir a chur in iúl do na hiarrthóirí nach féidir leo a bheith ag súil leis go gcuirfear faoi scrúdú iad ag am ar leith ná ar lá ar leith.**
8. Ní mór do na hiarrthóirí **uile** bualadh leis an Scrúdaitheoir ina ngrúpa nuair a thagann sé/sí go dtí an scoil. Iarrtar ar na scoileanna a dhéanamh cinnte go gcuirtear in iúl do na hiarrthóirí go bhfuil sin riachtanach, agus go gcuirtear seomra oiriúnach ar fail don chruinniú leis an ngrúpa.
9. Ós triail cheolchasaídh í seo, ní mór a bheith cúramach agus ionad na scrúduithe á réiteach.
  - Ní mór ionad na scrúduithe a bheith in áit sa scoil atá saor ó thrup agus ó chur isteach ó mhic léinn eile agus ó fhógraí ar an ngléas idirchumarsáide.
  - Ba chóir na trialacha ceolchasaídh go léir a chur ar siúl i seomra/halla **amháin** sa scoil. Má roghnaítear an teicneolaíocht mar ghníomhaíocht cheolchasaídh, caithfear an ríomhaire/trealamh a úsáidfear sa triail a bheith leagtha amach roimh ré san ionad scrúduithe sin, gan é a bheith nasctha leis an idirlíon. I gcúinsí eisceachtúla, e.g. más ar an bpíborgán a bheidh an t-iarrthóir ag seinm, ligfear don iarrthóir aistriú go hionad eile. Caithfear é seo a chur in iúl do Choimisiún na Scrúduithe Stáit roimh ré.
  - Beidh pianó nó méarchlár maith a tiúnadh ar na mallaibh de dhíth leis na trialacha neamhullmhaithe a dhéanamh.
10. Tá cead ag an bPríomhoide nó ag a (h)ionadaí a bheith i láthair le linn scrúdú, mar a shonraítear in *Cód Cleachtais i gcomhair Béaltrialacha agus Scrúduithe Praiticiúla*.
11. **Níl cead ag na hiarrthóirí ná acu siúd a bheidh á dtionlacan fón póca a thabhairt isteach sa scrúdú ar chúis ar bith.**
12. Níl cead ag an scrúdaitheoir aon chuid den scrúdú a phlé le haon duine. Aon cheist a bheidh ag aon duine faoin scrúdú, is cóir í a chur ar Choimisiún na Scrúduithe Stáit.